

摘藻堂四庫全書薈要

集部

欽定四庫全書舊要

宋文鑑目錄

卷一


賦

卷二

賦

卷三

賦



卷四

賦

卷五

賦

卷六

賦

卷七

賦

卷八

賦

卷九

賦

卷十

賦

卷十一

律賦

卷十二

四言古詩

卷十三

樂府歌行
雜言附

卷十四

樂府歌行
雜言附

五言古詩

卷十五

五言古詩

卷十六

五言古詩

卷十七

五言古詩

卷十八

五言古詩

卷十九

五言古詩

卷二十

五言古詩

卷二十一

七言古詩

卷二十二

五言律詩

卷二十三

五言律詩

卷二十四

七言律詩

卷二十五

七言律詩

卷二十六

五言絕句

六言絕句

卷二十七

七言絕句

卷二十八

七言絕句

卷二十九

詩

星名

人名

郡名

藥名

建除

八音

四聲

藏頭

離合

回紋

一字至十字

兩頭纖纖

五雜組

了語不了語

難易言

聯句

集句

卷三十

騷

卷三十一

詔

卷三十二

勅

赦文

冊

卷三十三

御札

批答

卷三十四

制

卷三十五

制

卷三十六

制

卷三十七

誥

卷三十八

誥

卷三十九

誥

卷四十

誥

卷四十一

奏疏

卷四十二

奏疏

卷四十三

奏疏

卷四十四

奏疏

卷四十五

奏疏

卷四十六

奏疏

卷四十七

奏疏

卷四十八

奏疏

卷四十九

奏疏

卷五十

奏疏

卷五十一

奏疏

卷五十二

奏疏

卷五十三

奏疏

卷五十四

奏疏

卷五十五

奏疏

卷五十六

奏疏

卷五十七

奏疏

卷五十八

奏疏

卷五十九

奏疏

卷六十

奏疏

卷六十一

奏疏

卷六十二

奏疏

卷六十三

表

卷六十四

表

卷六十五

表

卷六十六

表

卷六十七

表

卷六十八

表

卷六十九

表

卷七十

表

卷七十一

表

卷七十二

牋

箴

卷七十三

銘

卷七十四

頌

卷七十五

贊

卷七十六

碑文

卷七十七

碑文

記

卷七十八

記

卷七十九

記

卷八十

記

卷八十一

記

卷八十二

記

卷八十三

記

卷八十四

記

卷八十五

序

卷八十六

序

卷八十七

序

卷八十八

序

卷八十九

序

卷九十

序

卷九十一

序

卷九十二

序

卷九十三

論

卷九十四

論

卷九十五

論

卷九十六

論

卷九十七

論

卷九十八

論

卷九十九

論

卷一百

論

卷一百一

論

義

卷一百二

策

卷一百三

策

卷一百四

策

卷一百五

議

卷一百六

議

卷一百七

說

卷一百八

說

戒

卷一百九

制策

卷一百十

制策

卷一百十一

制策

說書

經義

卷一百十二

書

卷一百十三

書

卷一百十四

書

卷一百十五

書

卷一百十六

書

卷一百十七

書

卷一百十八

書

卷一百十九

書

卷一百二十

書

卷一百二十一

啟

卷一百二十二

啟

卷一百二十三

啟

卷一百二十四

策問

卷一百二十五

雜著

卷一百二十六

雜著

卷一百二十七

雜著

卷一百二十八

對問

移文

連珠

卷一百二十九

琴操

上梁文

書判

卷一百三十

題跋

卷一百三十一

題跋

卷一百三十二

樂語

哀辭

卷一百三十三

祭文

卷一百三十四

祭文

卷一百三十五

祭文

諡議

卷一百三十六

行狀

卷一百三十七

行狀

卷一百三十八

行狀

卷一百三十九

墓誌

卷一百四十

墓誌

卷一百四十一

墓誌

卷一百四十二

墓誌

卷一百四十三

墓誌

卷一百四十四

墓誌

卷一百四十五

墓表

神道碑

卷一百四十六

神道碑

卷一百四十七

神道碑

卷一百四十八

神道碑

卷一百四十九

傳

卷一百五十

傳

露布

臣等謹案宋文鑑一百五十卷宋呂祖謙編
考李心傳建炎以來朝野雜記稱臨安書坊
有所謂聖宋文海者近歲江鈿所編孝宗得
之命兩府校正刻板周必大言其去取差謬
遂命祖謙校正於是盡取祕府及士大夫所
藏諸家文集旁采傳記他書悉行編類凡六

十一門又稱有近臣密啟所載臣寮奏議有
詆及祖宗政事者不可示後世乃命直院崔
敦詩更定增損去留凡數十篇然迄不果刻
也此本未知為祖謙原本為敦詩改本朱子
語錄稱文鑑收蜀人呂陶論制師服一篇為
敦詩所刪此本六十一卷中仍有此篇則非
敦詩改本確矣商輅序稱當時臨安府及書
肆皆有板與心傳所記亦不合蓋官未刻而

後來坊間私刻之故仍從原本耳同時張栻
遺朱子書議祖謙此書無補于治道無補于後
學並責其承當編此等文字非所以成君之
德其論似高而實過朱子語錄記其選錄五
例亦微論其去取有未當然陳振孫記朱子
晚年語學者曰此書編次篇篇有意其所載
奏議亦係當時政治大節祖宗二百年規模
與後來中變之意盡在其間非選粹比也則

朱子亦深許之矣乾隆四十三年二月恭校

上

總纂官臣紀昀臣陸錫熊臣孫士毅

總校官臣陸費墀

欽定四庫全書薈要卷一萬九千九百二十四集部

宋文鑑卷一

宋 呂祖謙 編

賦

五鳳樓賦

梁周翰

伊京師之權輿也遐哉邈乎驗河圖之象按輿地之書
宅禹貢豫州之域距天文辰馬之墟因四履建侯之地
為六代興王之居城浚而都派河而渠結坤之絡振乾
之樞星躔櫛堵我民之廬海漕山廩我田之租勢雄跨

胡氣王吞吳茫茫萬國魚貫而趨惟聖皇之受命應期
運而握符光潛躍於龍德踐元亨於帝衢道德何師尊
盧赫胥揖讓何比陶唐有虞英略神武威憚八區封豕
必誅長鯨盡剝虎皮包刃鵠板搜儒墜典皆索闕政咸
鋪成天下之大務若雷奮而風驅乃顧京室時行聖謨
陋宸極之非制稽紫垣之舊圖且曰不壯不麗豈傳萬
世禹之卑宮蓋勿服之計堯之茅茨非經久之制矧象
魏之縣法伊億兆之所視況我力如天我費如地不漁

爾民不牟爾利一毫之費差足為易乃詔共工度景之
中因舊謀新庀徒僞功臺卑者豐棟易而隆椽斷而礲
去地百丈在天半空五鳳翹翼若鵬運風雙龍蟠首若
鼇戴宮丹楯霞繞神光何融朱楹虹植晴文始烘繡楣
焜耀彫拱玲瓏椒壁塗赭綺牕暈紅雙闕偶立突然如
峰平見千里深映九重奔星墜而交觸靈景互而相逢
門呀洞缺若天之裂縱舉百武橫駕六轍金鋪爍人光
景明滅舞陽之力莫得而排叔梁之力胡可以挾其下

則冠蓋葳蕤劍佩陸離車如流水待漏而馳駕肩排踵
兼蠻渾夷萬衆紛錯魚龍尊卑咸去來之由此競奔湊
於玉墀亶皇風之無外豈朝盈之有時三事庶尹乃拜
表蕭牆謁帝未央以落大壯登謨永昌曰

元聖明兮帝道昌威四海兮君萬方峙高闕兮冠百常
赫宋德兮垂無疆瞻天顏兮獻壽觴願君王兮長樂康
帝曰俞哉爾觴且置當聽朕言庶曉朕意頃於戎馬之
暇詳窺歷代之紀乃知乎夏德之衰璇室自庇商政之

壞傾宮大修楚王章華一身何寄秦皇阿房三世而棄
漢武栢梁孽火隨熾陳后三閤義師尋至豈非乎禍生
於漸欲起於恣亦如崇飲不已必至昏醉嗜色不已必
至乏瘁遷怒不已必絕人祀窮兵不已必暴人齒甘諛
不已必杜忠義溺讒不已必斥賢智亡國之君未嘗不
爾朕皆知之得以趨避淫於土木雅不如是美其成功
良以為愧不舉君觴恐驕朕志其大者天地所重者神
器尾虎足冰終日惴惴當共重之勿使顛墜謹謝公卿

無忘納誨群臣乃退咸呼萬歲

籍田賦

王禹偁

臣謹按周制孟春之月天子親載耒耜籍田所以事天地山川社稷先王醴酪粢盛于是乎取之恭之至也自周德下衰禮文殘缺故宣王之時有虢公之諫秦皇定霸鮮克由禮漢祖龍興日不暇給孝文孝景始復行焉昭帝弄田亦其義也後漢永平中明帝東巡耕于懷縣非古制焉魏氏親耕闕百官之禮蓋草創爾晉武太始

之年略修墜典宋文元嘉之代亦舉舊章齊用丁亥之
辰梁以建卯之月後魏北齊沿革有異隋朝唐室文物
可觀太宗行之于前明皇繼之于後自茲已降廢而不
行將煥先農必待真主皇家享國三十載陛下嗣統十
四年武功已成文理已定乃下明詔耕于東郊百執悅
隨三農知勸禮官博士蹈舞而草儀甸師嗇夫謠詠而
供職右拾遺直史館王禹偁再拜而颺言曰耕籍之義
大矣哉千畝之田三推之禮所以教諸侯而事上帝率

人力而成歲功實邦國之晏章皇王之大典昔潘安仁
賦之于晉岑文本頌之于唐今王道行矣王籍修矣神
功帝業煥其有光宜暢頌聲以播樂府謹上籍田賦一
章雖不足形容盛德亦小臣勤奉之至也其詞曰

十四年兮帝業遐宣寰區晏然乃順考於古道將躬耕
乎籍田務本勸農稽前文而備矣事神教養舉墜典以
行焉萬國歡心而懌懌百官供職以虔虔草儀注於有
司議沿革於遺編築壇墀之三陛開阡陌之百廛文物

聲明合禮經而有度旌旗衣服應方色而不愆既而屆
孟春擇元日太史先秦天子將出是月也道人徇路星
鳥中律當東郊之迎春是東作之平秩皇帝於是即齋
宮辭帝室戒錫鸞嚴警蹕乘青輅以有威儼朱紘而無
逸佩乎玉也懸黎之色蒼蒼載其旂焉干呂之雲鬱鬱
屬車負播殖之器後宮獻種桂之實紅縻黛耜服葱牂
以陸離縹輓紺轅駕蒼龍而飄歔太常之禮具舉司農
之屬各率甸師掌舍警御陌以惟嚴封人野廬設墻宮

而靡失于國之東千官景從風清塵而習習雨灑道以
濛濛時也木德盛陽氣克春芒甲坼青青兮蒼蒼春王
脉起油油兮溶溶冠蓋蔽野珮環咽風狀浮雲兮隨應
龍旂幟張日車徒塞空若衆星兮環紫宮修農事以惕
惕襲春服之重重爾乃配少皞祠先農尸祝無媿豆籩
以供太牢之牲薦之而肥腍太簇之樂奏之而春容于
是修帝籍勞聖躬撫御耦以無怠履游場而有蹤將循
乎千畝之制豈止乎數步之中耕鉤耨之弄田但矜兒

戲脩建康之春藉耒煥農功有以見萬乘之尊三推而
舍或五或九隆殺之義有倫爾公爾侯貴賤之班相亞
嗇夫灑種以斯畢庶人終畝而告罷千耦其耕煥乎禮
成播百穀兮率人力訶載芟兮揚頌聲將見乎餘糧棲
畝腐粟如京神倉令納乎黍稷以備粢盛廩犧氏收其
藁秸用餉犧牲親畎畝兮化被重民天而教行自得訓
農之實非貪慕古之名然後下青壇歸絳闕百姓知勸
群后咸謁在鎬之宴啓訶虞之音發獻萬壽兮懽呼奏

九韶兮鏗越開三面以行惠宥五刑而審罰恩流於孝
悌力田德被於雕題辨髮興五土之利固必躬而必親
同三代之風復不矜而不伐大矣哉籍田之禮豈三年
而不為躬耕之義將百代而可知我所以舉久廢之禮
定不刊之儀慮弗勤於四體將有害於三時務農桑兮
為政本興禮節兮崇教資民乃力穡歲無阻饑神農斷
木之功我其申矣后稷播時之利我得兼之供秬鬯以
斯在介豐年而有期丕顯事天之禮誕謌祈社之詩祀

山川兮神鑒明矣配祖考兮德馨遠而永錫純嘏用光
孝思乃作頌曰倬彼東郊公田是闢大君戾止言耕其
籍帝籍既脩乃及公侯親爾耒耜勤爾田疇言采黍稷
祀于圓丘億萬斯年以承天休又曰倬彼東郊耕壇其
崇大君戾止言訓其農農功既督乃知榮辱爾家以給
爾人以足言奉烝嘗享于此屋億萬斯年以介景福

端居賦

种放

予嘗闔扉而居不樂他游未嘗以一詞輒干公侯以借

浮譽門外苔封草織非知己之深者無一造其居或罪
予曰嗟乎明逸上有明天子賢執事子獨貧且賤恥也
又易稱君子以貞凶子其有是乎予退而作端居賦
山鳥寂寂梧陰晝碧窮居退夫耿然不憚精神沮而徬
徨冠屨陋而跼蹐類沈酣而未醒豈執迷而莫析固貽
譏於獨善尚多言而自釋鯨鵬雖大無風波而何益胡
粵萬里捨舟車而奚適在聖賢雖有志于下民孰能無
位而立辟况予才不造於往哲名器敢期於苟得在得

喪不忘於明聖顛沛必思於正直終皮弁以自守惡鵠
冠以假飾進不妄而嘻嘻退不怨而戚戚故孟軻有言
雖有鎡基不如逢乎有年顏氏幾聖樂在陋巷亦將育
乎令德茲窮通之自信匪古今之可尤顧竊位而擇肉
兮予誠自羞寧守道而食芹兮中心日休予將息萬競
消百憂養浩氣於蓬茅之下飲清源於淵默之流侶鸛
鵠兮雲霓之表終焉泯衆議之啾啾

大菟賦

丁謂

司馬相如揚雄以賦名漢朝後之學者多規範焉欲其
克肖以至等句讀襲徵引言語陳熟無有已出觀子虛
長楊之作皆遠取傍索靈竒瑰怪之物以壯大其體勢
撮其辭彩筆力恢然飛動今古而出入天地者無幾然
皆人君敗度之事又於典正頗遠今國家大蒐行曠古
之禮辭人文士不宜無謠詠故作大蒐賦其事實本之
於周官歷代沿革制度參用之以取其麗則竒言逸辭
皆得之於心相如子雲之語無一似近者彼以好樂而

諷之此以勤禮而頌之宜乎與二子不類辭曰

仲冬天子嚴祀事答神祐佇農隙謹蒐狩踵教本稽典舊
禮容左右武事前後等尊第早上長下幼人民豐濃物色
繁富蓋亦閱軍實於介冑非徒恣遊畋於禽獸者哉前期
命虞人以采芡蒼芰擁遏草木夥鉤原隰砥闕視軍衆
寡度地本末高表四立坦場中豁限田防而闌織志轅
門而旌揭青龍白虎擁護乎行在之所左罕右畢分張
乎侍衛之列風蕭蕭而野鳴雲陰陰而晝結麋鹿狼狽

以授林狐狸踉蹌而遷穴由是司馬舉職群吏咸秩各有司存皆給名物備小駕而六龍集開武庫而五兵出輅車金玉旂章日月戟牙刺舉旄頭雪密畫蚩尤於旆顛匣干將於劒室馱駛妥貼以負輶驪騶徘徊而轉軼召飲飛以前導命玄武而殿卒目恍羅列神驚比櫛師勅戰法帥董戎律始建旗以誓衆亦斬牲而戒失所畋之野備物咸畢外事尚剛戊日惟吉上乃乘七騶擁六軍白旄方下於北極黃纛已褰於應門服章天地車駕

風雲日隨月侍嶽走川奔列缺收聲而聽蹕豐隆鼓力
以扶輪隊仗乎八百諸侯殿呼乎七十二君煙霞錯雜
以垂地河漢顛倒而失源靈祇懾慄恠物騰騫顙帝蒼
黃而廢職元冥倏閃以馳魂儼方離於大內盛已列於
平原禡表云已銜杖而前虵陣翼張虎賁環匝鼓以三
闐圍不四合律戎索以濟濟飭軍威而燄燄鏢再振而
鐃再鳴弓斯張而矢斯挾爾乃驅百獸當一人弓工操
軒轅之弧奉御羅氏設商湯之網擁群熊羆之爪距摧

折虎豹之心肝裂分射必三獸發則五豝電逆毛羽星
颺角牙肉墮庖丁之刀血濺魯陽之戈諸侯卒事以儼
雅百姓突圍而交加上方斂綏以慘愴衆乃靡旗而誼
譁圍開一方憫盡殺也捨順取逆彰懷來也出表不顧
恥逐奔也等別三殺貴宗廟也得匪上以顯孝思下以
不憊乎鳥獸之肉不登噐者無取貔虎之士罔用命者
有誅警進退於鉦鼓習威儀於卒徒戎事同鑾輅廻軍
聲振而萬國聳立天仗指而九門洞開郊饁獸而禮之

勤也廟獻禽而神其享哉以勞飲至以能策勲刑必加
於共棄爵乃及乎衆尊如是則不曰暴天物不曰教民
戰于以辨名號而訓仁義于以昭文章而明貴賤也下
臣竊詳三代之書頗究二王之典大閱之制昭然義見
軍旅之事闕教則失利祭薦之制非理則不獻施信賞
率怠倦使夫民知方兵識變莫若示蒐畋而敦大勸也
後之王者反禮叛經荒樂誅殺放懷蕩情借如漢武於
古詳明博搜聖書廣召文英講評謨訓華飾聲明凡曰

大樂闕焉不行乃窮畋極獵誇國耀兵隔蜀羅設跨秦
戈橫麇卵夭死猶狘愁聲以至欺猛狂而手格喜暴惡
以力爭豈殘忍之足恥唯豪勇之所京下垂歷代不能
變更魏晉而下離合寰瀛咸局促以僅守曷禮樂之能
興粵抵李唐時惟會昌彼文明二帝實驅馳百王大畋
之義猶或廢亡者若陛下自膺寶命臨萬方動必法度
舉皆故常緝犧軒之絕緒新姬孔之舊章郊焉而五帝
肅肅享焉而百神洋洋九年三月升于紺壇十有三年

躬耕籍田心以民本事由禮先謫王滿嗜慾乎馳騁斥
帝徹瞽瞍乎神仙故天地不能藏祥而祕瑞日月無以
示譴而戒愆甘露降而區宇澤景星燭而氛祲蠲總治
本操化源措慮寂爾存神泊然是以發狂之心無自入
焉下臣以謂大蒐之典周公制於往古陛下行于今茲
中間數千餘祀咸杳昧而不知彼唐漢之士脩崇禮儀
封禪之徵誕明堂之說竒此數事不詳於堯舜文武之
書臣寧敢狂斐而陳諸所以賦大蒐而謦盛禮也俾千

古知至德之巍巍

洞庭賦

夏侯嘉正

楚之南有水曰洞庭環帶五郡森不知其幾百里臣乙酉夏使岳陽抵湖上思作賦明目披襟而觀之則翼然動足然跂慄然駭愕然貽恍若駕春雲而軾霓浩若浮汗漫而朝躋退若據太山之安進若履千仞之危懜若無識智若通微跂若不倚蹌若將馳耳不及掩目不暇逡情悸心嬉二三日而後神始宅氣始正若此不敢以

賦為事者二年然眷眷不已一日登崇丘望大澤有雲
崒兮興歎兮止興止未霽忽若有遇由是漬陽輝沐芳
澤覩一異人于巖之際霞為裾雲為袂冰膚雪肌金珎
玉佩浮邱羨門斯實其對因言曰若非好辭者也臣曰
然然則若智有所不通識有所不窮用不通不窮而循
乎無端之紀若得無殆乎臣又曰然然至極則物應思
精則道來嘉若之勤無譁無談吾為若稱云太極之生
曰地曰天中含五精五精之用而水居一焉水之䟽邇

則為江兮遠則為河積則為瀦兮總則為湖若今所謂
洞庭者傑立而孤廓然如無區其大無徒含陽字陰元
神之都曖曖昧昧百川不敢逾有若神者有若賓者有
若僕者有若子者有若附庸者有若娣姒者有若禹會
塗山武巡牧野千出百會咸處麾下每六合澄靜中流
迴睨莽莽蒼蒼纖靄不翳太陽望舒出沒其間萬頃咸
沸彊而名之為巨澤為長川為水府為大淵縱之不踰
跼之不卑乍若賢人以重自持誘之不前犯之愈堅又

若良將以謀乎邊彭彭漠漠浩爾一致又若太始未有
仁義沖沖漠漠二氣交錯又若混沌凝然未鑿此乃方
輿之心胸溟海之郭郭也三代之前其氣濩落浩浩滔
天與物迴薄滅木襄陵無際無廓上帝降鑒巨人斯作
乃命玄夷授禹之機隧山堙谷滌源暢微然後若金在
鎔若木在工流精成器夫何不通是澤之設允執厥中
既異其性遂得其正有升有降有動有靜臣應之曰升
降動靜可得聞乎神曰水之性非圓非方非柔非剛非

直非曲非玄非黃劃象為坎本乎義皇外婉而固內健
而彰降以姤始升以復張其靜處陰其動隨陽六府之
甲萬化之綱式觀是澤乃知天常若乃四序之變九夏
收處烘然而炎沸然而煮群物鴻洞爍為隆暑澤之作
頽然其容若去若住若茹若吐靈趨恠覲杳不可覩蒸
之為雲散之為雨倏忽萬象如還太古真可嘉也若乃
秋之為神素氣清泚肅肅脩脩群籟四起澤之動黝然
其姿若挺若倚若行若止巽宮離離為之騰風蒼梧崇

崇為之供雲四顧一色黯然氤氲其聲瀾瀾若商非商
若徵非徵東湊海門一浪五千里又足畏也言其狀則

石然而骨岸然而革氣然而榮降

戶江切

然而脉有山而

心有洞而腹有玉而體有珠而目穹鼻孤島呀口萬谷
臂帶三吳足跬荆巫或跂然而望或翼然如趨彭蠡震
澤詎可云乎臣又問曰澤之態已聞命矣水之族將如
何居神曰大易變易或文或質沉潛自遂其類非一或
被甲而遭或曳裙而仵或禿而跋或角而蜿或吞而呀

或吐而牙或目以之蟹或脩以之鰕或挺臂而立或橫
驚而疾或髮於首或髯於肘或儼而莊或毅而黜彪彪
玢玢若太虛之含萬景各備其生而合乎群者也臣又
問曰若神之資其品何如也神曰清矣靜矣麗矣至矣
邈難知矣肇于古古有所未達形于今今有所未察非
希非夷合其心於自然然後上天入地把三根六况水
居陸處夫何不燭彼鯁鯁之賢轡龍之仙乃吾之肩也
其餘海若天吳陽侯神胥齟齬而遊曾不我儔臣又問

曰易稱王公設險是澤之險可以為固而歷代興衰其
義安取神曰天道以順不以逆地道以謙不以盈故治
理之世建仁為旌聚心為城而弧不暇弦矛不暇鋒四
海以之而大同何必恃險阻何必據要衝若秦得百二
而帝齊得十二而王其山為金其水為湯守之不義歟
然而亡水不在大恃之者敗水不在微怙之者危若漢
疲於昆明桀困於酒池亦其類也故黃帝張樂而興三
苗棄義而傾則知洞庭之波以仁不以亂以道不以殘

惟賢者觀之而後得也於是盤旋徙倚凝精流視罄以
辭對倏然而晦

矮松賦

王 曾

齊城西南隅矮松園自昔之間館此邦之勝槩二松對
植卑枝四出高不倍尋周且百尺輪囷偃亞觀者駭目
蓋莫知其年祀亦靡記夫本源真造化竒詭之絕品也
曾咸平中忝鄉薦登甲科蒙被寵靈踐歷清顯幾三十
載前歲秋始罷冢司出守青社下車之後省閭里訪故

舊則曩之耆耄悉淪逝童冠皆壯老邑居風物觸目遷
變惟彼珍樹依然故態竊謂是松也匪獨以後凋克固
歲寒抑由擁腫支離不為世用故能宅茲臯壤免於斤
斧向若負構廈之材竦凌雲之幹將為梁棟戕伐無餘
又安得保其天年全其生理哉感物興歎聊為賦云
惟中齊之舊國乃東夏之奧區有圓游之勝致直廕閑
之坤隅偉茂松之駢植軼衆木而特殊上輪囷以夭矯
旁翳蒼而紛敷廣庭廡之可蔽高尋常之不踰枝擁閼

兮橫亘根感縮兮盤紆徒觀其前瞻林嶺却枕康衢宅
寶勢兮葱鬱據右地兮膏腴類蟠螭兮螭蟠訝騰倚兮
虎驅將挈攫兮未奮忽伏竄兮爭趨色闔鮮兮欲滴形
詭俗兮難圖遠而望之蔚兮若搏鵬之出滄海迤而察
之黝兮若方輿之承寶蓋竄洞口之歸雲堆崑阿之宿
靄談揮塵兮何多被集翠兮增汰度朔吹兮颺颺含陽
暉兮晻藹吾不知其幾千歲起毫末而碩大昔去里兮
離邦攀綠條兮彷徨今剖符兮臨郡識奇樹兮青蒼怵

光景兮遙邁嘉歲寒兮益彰葉耗耗兮不改情眷眷兮
難忘異古人之歎柳協予志之恭桑信矣夫卑以自牧
終然允臧效先哲之俯偻法幽經之伏藏願跼影於澗
底厭爭榮於豫章鄙直木兮先伐懼秀林兮見傷幸高
梧之垂蔭愧脩竹之聯芳鸞乍迷於枳棘鸚每悞於榆
枋婉周雅之踏地符義易之巽牀既交讓以屈節復善
下而同方自儲精於甘實不受命於繁霜客有系而稱
曰材之良兮梓匠之攸貴生之全兮蒙莊之所美苟入

用於鈎繩寧委跡於塵滓俾其天性而稱珍曷若存身而受祉紛異趣兮誰與歸當去彼而取此

聲賦

張詠

聲賦之作豈拘模限韻春雷秋蟲之為事也蓋取諸聲成之文王化之本苟有所補不愧空言爾賦曰

罔象迷冥大人忽生混沌初竅呀然震驚二儀吐形萬靈吐英天機動制軋而為聲故形有美惡焉聲有大小焉伊物類之動作俟人事而克全至于大雷隱空萬竅

吼風不為之隆品物磨臬羽足動發不為之末末若人
聲與天通功與物長雄口吻之啓出於厥躬道機之張
騰凌鴻濛其所聞者羲黃唐虞繼踵而至宇宙隘其神
造化侔其智在聲之偉也得不迴天而動地觀其得一
之發清清泠泠涼裛洗瀛萬類聽之如懵而醒仁信之
發溶溶奕奕呼道振德萬類聽之如日破黑曰禮曰義
相迭而起鳴孝響悌駭心清耳萬類聽之如愁得喜廣
成五老聞而啓齒曰是何帝皇之聲也如此九道交訛

華夷和歌蠢動鼻息歡咍寔多其在物也昭昭融融萬
緣和同萬籟響空答天之功其在人也萬心氣平萬口
宣騰雲門六英答君之聲故知五音八聲聲之枝歟金
石絲竹聲之器歟若本不正而聲不清何嘗動天地泣
鬼神而有諸三五迭生異業同聲唱古寡應呼今得精
儀事以之繁會時風為之勁清作禮者有周旋之矩制
樂者有大武之名故聖人之音鏗如鏘金聖人之治潺
如流水加以商辛夏癸行無轍軌情慾沸空淫哇盈耳

民不知告政聲遂毀幽厲縱作心胡可度唱僻者輕脫
和偽者交錯鼓鉦之響日馳禮義之風日薄王道民政
潰然投壑攻乎亡國之音聚為終身之樂秦政一聲天
搖地坑烘赫火烈荒茫海傾阿房輦材枿泉山迴紫塞
築壘訇轟震雷鉗聖愚儒四海睽孤刮剥亡命痛腦連
脛于是民失其業怨口喋喋野薄其農荆榛颺風刑失
其矩民哀無所兵革填委死為怨鬼故怨之為氣也散
為囂塵積為屯雲閉鬱六合陽靈不曛怨之為聲也烈

風相倚怒濤兼起鬼哭於郊神號於市川谷為之闐擊
山巒以之崩圯陳吳一呼而宗社瓦毀天窮地終醜聲
不已洎于漢唐惟高與光太宗纘堯開元嗣皇智冠絕
古氣凌昊蒼倚天憑怒即動盪於八荒按劒大呼即交
映於中方借力者黎獻助聲者賢良亦不能廣仁義於
邇奏使道德之激揚掩商秦之餘韻系唐虞之聲芳者
也未若我后凝神定思誠求理致與聖作則為難於易
惟禮是崇惟仁是嗜叩乎杳冥清靜以聽聞古謬惑皇

心不平於以忠良是旌息嗟吁之聲不肖是黜息濫謬之聲均物惻隱息哀怨之聲厚施薄斂息流亡之聲四人是別息澆競之聲狴犴是理息冤枉之聲道德是守息兵革之聲人勞是恤息彫斲之聲小人是遠息邪佞之聲正音是奏息恣憑之聲奇哉壯矣堯嗟舜驚致章濩之調下覺唐堯之頌輕浩浩蕩蕩無得而名異聲之襲也揚溢昭灼上賢下愚既歡且謔鳥獸蹢躅虫虺躍躍信千載之一時與有生而同樂余欲引聲而作未知

何若

春雪賦

錢惟演

癸亥歲二月晦訖季春旦霰雪雜下平地二尺寒威於是凌厲陽和為之潛伏問諸農曰田有傷矣問諸圃曰果不實矣考諸史曰陰陽戾矣予守土者豈不以民為心因愴然而賦

春陽以中百昌俱作彼陰冷而忽興何飛霏之驟落始蒙蔽於陽鳥遂潛藏於天幕冰霰雜下溫寒相搏纔袞

袞而紛揉更霏霏而交錯因方就圓填溪滿壑迷匹練
於素鵬混高雲於皓鶴七盤頓失乎巖嶮二室僅存乎
岷嶧我有爰田既鋤既耰我有條桑且棧且柔豈臧裂
而是取顧沃若之待收罹此暴殄予心則憂亦有庶草
群木千芳萬菲粉落絮起珠傾玉碎建森纒之高牙垂
陸離之長佩掩藩閭之鬱栖覆臺塘之畏於鬼切佳醉癸切
病李殭於井幹芳蘭沉於林薈有卉萋萋有鳴嚶嚶移
薦草以無所戀危巢之欲傾顧澤中而罷釣之壠上而

輟耕手足皸瘃吾道不行吾乃詩歎麻衣歌悲黃竹兔
園靡召於游客鉞山遂休於王屬隔瑤水之來使沒騷
人之行轂東郭歎不完之衣梁山作思歸之曲豈由漢
女之冤遂至衛民之哭已而違時令反天常氣雖淒而
不烈風雖暴而不揚忽曜靈之委照佇消釋於輝光

君可思賦

楊億

夫生民在世兮事之攸同子之能仕兮父教之忠念委
質而勿貳兮本陳力以首公雖代耕而俸祿兮曷期侈

以圖豐亦懷材而待試兮將乘時而奮庸夫何直諒不
回孤堅寡偶貫歲寒而勿改兮濯江漢而無垢中履絜
以好修兮外葆光而虛受筮仕逢亨奏技承平濯鱗禁
沼拊翼丹楹堯文載郁禹律惟精荷紫囊而舐筆兮從
單于之勒兵霜飈刮骨流塵滿纓自此研精藻翰局影
天局毫殘鷄管香消鶴綾鬢凋屋幘心懸閤鈴矧乃郢
坊酒醇武都泥紫版急鵠頭書詳馬尾石屋紬書鴻都
約史攬撫闕遺發明統紀竊企跡於前修庶同風於古

始慮罔越思身亦勤止宣漢德於無窮納舜韶於美美
志本勿矜言乎有憑非施勞而伐善豈揚已而害能每
燥吻而躑躅屢撫心而屏營激談泉而載洄鼓思風而
弗興感外邪而邁癘殆五日之沈冥帳官事之孰了汨
勞府而靡寧豈望夫連城之報豈愛乎畫餅之名羗民
生之朴忠希在昔之遐蹤思不出位罔貪天功慕臺駘
之業官肯有二事念犁彌之辭賞愈激厥衷庶克終於
雅尚聊有埤於素風奈何虺心昌熾錦言萋斐蠅虺虺

以交亂犬狺狺而迎吠賢登朝而共嫉女入門而各媚
乍緝緝以翩翩競翕翕而訛訛結合隱邪締造疑似俾
朕師之震驚恣星箕之華哆幸大度之不校專巧言而
縱毀胡能傷君德之巍巍徒以動賢心之惴惴然後飾
衛鶴之華軒銜黔驢之短技竊名器以宴居絕上下之
愧畏俟貫惡之既盈將幽神而共棄若夫晬穆東房奚
望清光定心服物偉量包荒耿求賢兮不及慎乃憲而
惟康延登體貌義問覃詳伊蓬心之受惠憐橘性之有

常寘之近署采其寸長遇忠見察浸潤無傷犯四禁而
多恕緩干編而不遑丁寧一札在宥三章踐丹塗而乃
春宴華林而醕觴動群倫之聳羨曷丹心之弭忘盛憲
多憂長卿沉疾退迹東岡之陂舉首長安之日色變秋
鬢讒消病骨周田食粟聊彊飯於數升江徑誅茅姑却
掃於一室豈不念悲哀作主眀畝思君羈心蘄苦別緒
絲棼崕江一厘韋天畿之接畛成周五世庶宰樹以參
雲感騷人之遺韻聊抒意於斯文



宋文鑑卷一

欽定四庫全書薈要卷一萬九千九百二十五

集部

宋文鑑卷二

宋 呂祖謙 編

賦

皇畿賦

楊 侃

有賦家者流欲馳名於當世思著詠於神州忽念前古
深懷景慕誦二京於張衡覽兩都於班固於是輟卷意
慙閣筆心伏讓而謂臣請書簡牘臣辭不獲已而謂之
曰子讀二子之賦而知兩漢都邑之制宮殿之麗而未

知大宋畿甸之美政化之始也予幸得職採風謠官參
儒雅千里之郊圻是巡八使之軺車斯假若夫大邑名
城神臯沃野畫地可記濡毫可寫至於宮禁之深嚴予
未聞也都城之浩穰衆所覩也是故彼述其內予言其
外蓋萬分之舉一難盡述而備載昔者唐綱不振國鼎
將遷俄梁室之革命啓浚都而應天既觀法於左嶠右
隴亦取則於西澗東瀍大矣雄圖昭然聖謨謂陳留天
下之衝要謂大梁海內之膏腴漢祖得之則齊楚之敵

敗亡相繼成就擒而即誅梁王守之則七國之師不敢
西向盡為馘而為俘實王氣之長在宜萬世而作都也
莫不廣封溝設險固襄平割宋之美田戴邑裂曹之沃
土滑分屬邑之二城陳滅太康之萬戶潁川之鄢陵扶
溝滎陽之中牟陽武咸命落編民於州籍升地圖於天
府故得雄臨九州陋視三輔經營歷於五代法則垂于
萬古皇宋之受命也太祖以神武獨斷太宗以聖文誕
敷平江表破蜀都下南越來東吳北定并汾南取荆湖

是故七國之雄軍諸侯之陪臣隨其王公與其士民小者十郡之衆大者百州之人莫不去其鄉黨率彼宗親盡徙家於上國何懷土之不聞甲第星羅比屋鱗次坊無廣巷市不通騎於是有出居王畿掛戶縣籍興產樹業出賦供役者矣豈比夫秦選戶口於咸陽漢徙豪傑於陵邑魏將實於河南驅冀民而是入也今聖上之在東宮也尊以皇儲尹茲京邑視政之初民訟雲集莫不察之以情偽辯之以曲直發伏禁姦親剗繁劇既而枹

鼓不鳴豪右斂迹吏不敢欺民用懷德若乃龍樓曉出
奉法謹身教民以事父也親拜師傅降禮國儲教民以
事師也公退則侍講在前出入則四賓是翼尚老尊學
與民為則是時王畿之內易俗移風以至正南面居域
中由內及外化行令從是君上德惠素立而正教早崇
也若乃銳旅百營高城千雉孫武教陣吳起撫士其齊
如林其猛如虎手擊利劍足張彊弩躍馬奪槊投石拔
距入則訓練出無征戰身閒賞厚家有餘羨是故擁彊

兵衛近甸如大郡雄藩為屏為翰者且有九縣

尉氏咸平陳留

雍丘襄邑太康考城東明陽武也

天設二渠曰蔡曰汴通江會海縈畿

帶甸千倉是興萬庾是建杜預主計劉晏司漕何貢何

輸吳粳楚稻月致百萬猶責其少漢之太倉積粟紅腐

使彼粒而計之未及我斗量之數成王之庾萬箱以供

未若我千艘往來運江淮而無窮是故備九年之儲充

六軍之給當津處要山積雲入者復有五邑

陳留雍丘襄邑尉氏

咸平也

若乃愬戎者貴領專城宰邑者上應列星簿既資

高尉亦秩清率兵守戍者五鎮

建雄義聲園城馬攔萬勝鎮皆置甲士防守有

使臣掌領之

統騎分巡者兩路

府界東西兩路各置都同巡檢二人

城隍之外

遊徼四布

京城四面巡檢各一人

桓桓八臣是警是護

謂東西兩路洎京城

四面巡檢使臣共八人也

郊原膾膾春草萋萋邊烽不警牧馬爭嘶

廐空萬櫪野散千蹄陂閭牧南

汴河已南縣邑長陂廣野多牧放之地

沙

平走西

中年已西地廣沙平无宜牧馬

一飲空川一齧空原去如霧散

來若雲連地廣馬多古未有焉若乃任土出於民心獻

芹比於古俗園茄早實時菓先熟瓜重南門笋宜修竹

鬻於市兮利既兼倍進於君兮恩必霑沐時或戴勝降
桑螵蛸未鳴野人登麥以先至蠶婦貢絲而已成別有
襄陵之桃陽夏之柿朱櫻宜於谷林丹杏出於尉氏其
或陽鄉千樹之梨扶樂千樹之栗比封千戶之侯亦何
讓於昔日鹹壤宜北鄉之羊野莎美東邑之豕魚鼈鳧
鴈之盛西有陂兮萬頃菱芡蓮藕之美東沿堤兮百里
其或仲冬之月禮尚進鮮介麋素出於逢澤狡兔復多
於梁園乃命萊田於虞人選徒於司馬四校畢陳六飛

夙駕何千乘萬騎之馳騁滿四通五達之郊野西或過
於圃田之藪東或出於平臺之下乃有孟賁之徒烏獲
之類擅褐而來叱咤而至搏虎兕擊熊豕元豹逆曳白
狐生致復有負羽從獵之人控弦伏獸之士落孤鴈於
馬首貫雙雕於雲裏然猶示之以三驅之仁寬之以一
畝之網不使獸殫於下禽盡於上何長楊之獵自謂於
禽多雲夢之畋敢誇其地廣哉圖書載詳境土斯見開
封則漢志之名邑今二赤之首冠祥符則天書之降年

易新名於舊縣稔稔之入斯為近甸若乃百萬衆之分
營十二市之環城囂然朝夕異彼郊坰其東則有汴水
之陽宜春之苑向日而亭臺最麗迎郊而氣候先暖鸞
轉何早花開不晚瞻太一之清宮壯先朝之命工構宇
煙霞之外出俗囂塵之中效仙人之樓居慕老氏之玄
風青青道邊千畝何田端拱之初藉于此焉黛紉一執
青史千年登蓼隄以東望見高臺之百尺居道之南在
岡之北下有廣場可馳可逐我皇帝初即寶位大閱軍

旅親乘戎輅習戰于此士馬秋勁甲冑晨整上憑軾以
將觀衆無譁而是聽列八陣之形申三令之語肅將帥
嚴部伍頗牧授之以方略韓彭進之以旗鼓失軍容者
戮以徇衆有勇敢者賞而裂土彼上林之馳射驪山之
講武豈可同日而語哉其南則有崇崇清壇肅肅齋宮
卜是吉土龜從筮從永奉禋祀郊見昊穹燔柴展禮萬
世無窮別有景象仙島園名玉津珍果獻夏奇花進春
百亭千榭林間水濱珍禽貢兮何方怪獸來兮何鄉郊

數既樂山林是忘則有麒麟含仁騶虞知義神羊一角
之祥靈犀三蹄之瑞狡狴來於天竺馴象貢於交趾孔
雀翡翠白鵬素雉懷籠暮歸呼侶曉去何毛羽之多奇
罄竹素而莫紀也忽斷苑牆又連池籞介族千狀沙禽
萬類盡游泳而往來或浮沉而出處柳籠陰於四岸蓮
飄香於十里屈曲溝畎高低稻畦越卒執手吳牛行泥
霜早刈速春寒種遲春紅粳而花綻簸素粒而雪飛何
江南之野景來輦下以如移雪擁冬苗雨滋夏穗當新

麥以時薦故清蹕而親至輦從千官郊陳萬騎既觀穫
以云罷亦宴犒而後已其西則有池鑿金明波寒水殿
鷁首萬艘而壓浪虹橋一道而通輦太液無濫觴之深
靈沼有潢汙之淺時或薰風微扇晴瀾始暖命樓船之
將軍習昆明之水戰天子乃駐翠華開廣宴凭欄檻於
中流瞰渺茫於四面俄而旗影霞亂陣形星羅萬棹如
風而倏去千鼓似雷而忽過則有官名伙飛將號伏波驤
江中之龍避船下之戈黃頭之郎既衆文身之卒且多類

虬龍而似蛟蜃駭鯨鯢而走鼉鼉勢震動於山嶽聲沸騰於江河別有浮泛傀儡之戲雕刻魚龍之質應樂鼓舞隨波出沒鑾輿臨賞以盡日士庶縱觀而踰月液池之南有苑何大既瓊林而是名亦玉輦而是待其或桂折天庭花開鳳城則必有聞喜之新宴掩杏園之舊名於是連鑣上苑列席廣庭蓋我朝之盛事為士流之殊榮一派如飛通漕架虛越廣汴湍流之上轉皇城西北之隅貫都注御溝之口轉漕通廣濟之渠京索導源而

于彼金水名河而在茲其北則含芳舊苑瑞聖新名四方異花於是乎見百疇好鳥於是乎聞十洲儼景三島分春延廡之設是名天駟伐大宛以新求涉渥洼而遠致群驅八騎隊數十驥雖輓粟之千車乃嘗秣之一費彼沙臺之崔嵬聳佛刹之千尺岡阜連延於西南原田平坦於東北何沙海之飛揚忽到此而止息莫不地多賢士代出異人何干旄之子子向浚郊而雲臻雖梁多於長者非安國而不聞過信陵之祠宇想英風而若存

何侯嬴之白首尚抱關於夷門遇公子之好賢忽枉駕而咨詢既同載而過市謁隱屠而駐輪果嘉謀之斯得救邯鄲而義伸奪晉鄙之十萬終自將而却秦設守冢而奉祀值漢皇之東巡若乃過陳留之故邑訪地名之所因蓋二留之分別彼彭城而此陳昔赤帝之起義會子房而于此始錫賢於上天終受封於茲地既萬戶以建侯亦千年而崇祀千屯北縣之郭郭三月南河之鄠市何飛梁之新遷患橫舟之觸柱今之雍丘古曰杞國

民厚風俗土繁貨殖縣之西郊山曰谷林其或花迎野
望煙禁春深景當妍麗俗重登臨移市景日傾城賞心
幄幕蔽野軒蓋成陰暮而忘歸樂不絕音既同歡於萬
室罔惜費於千金厥篚織文出於襄邑池濯錦以為名
蜀有江而焉及復有咸平大縣我宋新建因紀年以命
號詔將作而營繕公宇之制甲于畿甸中有大川通闌
帶閭貫都邑而北來走江湖而南會何客棹之常喧聚
茶商而斯在千舸朝空萬車夕載西出玉關北越紫塞

徵尉氏之名本大夫之邑蓋鄭國之上田俾獄官而世

襲何彼樂郊今為畿地爰有仁木應乎嘉瑞二崇合生

雙榆連理槐獨秀而通枝木異類而同氣良宰畫圖而

來聞大尹飛章而奏異莫不召虎殿之宿儒集麟閣之

名士驗彼祥經考乎信史表六合之一家而帝德之光

被也加以地多藪澤利有蒲魚晴澗望晶陂之色山水

觀惠民之渠乃有檝師炭商交易往復素衣化緇漆身

同色行舟則夏瞻雲雨售貨則冬禱雪霜經宋樓而關

征既薄歷朱曲而市稅有常潺潺洎溝渙渙有水入鄢
陵而碧截原田過扶亭而清耿閭里珍貨奔馬欄之道
豪俠聚建雄之市彼東昏之舊城易美號於新室似興
廢之有時而圖讖之預出何以明而代昏符作畿於聖
日考城之人舊俗剛毅鄉出勇夫里多壯士椎埋為姦
任俠尚氣睚眦必報盃間刃起今為畿民禮束化被暴
虎之徒聞義則畏南徂太康淮陽甚邇地宜瑯玕家有
蒼翠城過兩扶溝踰二備地既成於上田人不趨於末

利桑成陰而春繁棗結實而秋美問中牟之耆民歎魯

恭之仁宰何三異之善政有千年之遺愛遇我后之盛

明西朝拜於園陵瞻路隅之靈廟想前史之嘉名祭以

上公之禮爵以太師之榮若夫八澤

圖經有八澤清口澤管澤鴈澤蓼澤

溥澤卑澤龍澤滑澤也

九溝

九溝謂醋溝鵲鳥溝青陽溝泥蓼溝渡沒溝丈八溝浮家溝白馬溝也

二池

青陽連藕

三固

潘固朱固鄭固也按圖經取高阜堅按固名也

周流原野表界

境土宿萬勝以遙觀見斗門之雙注吸驚浪以橫來絕

長隄而可懼其始也患彼決溢利其填闕溉萬頃之陂

澤變千古之爲鹵盡若膏腴咸通耒耜有若決漳灌鄴
旁之田鑿涇沃關內之土然後疏導入白溝之流會同
爲漕渠之助彼梁固之在東亦派分於波勢

梁固斗門在萬勝鎮

東三十里景德四年置

沿流有一舍之遙測水無寸差之異何一

啓而一閉常若合於符契始注陂而雷聲終入渠而駟
逝散濁浪以澄沙廣良田而濟世指陽武以北邁涉博
浪之長沙岡斷續以千疊塵飛揚而四遮人迷途而莫
辨鳥投樹以何賒策不進兮我馬輪欲埋兮何車過戶

牖之名鄉乃曲逆之舊里何分社之稱平已宰國而有
志經計相之里中思張蒼之善筭屈柱史以事秦榮列
侯而佐漢宜二賢之靈祠歷千古而輝煥西望河流襟
帶二邑高岸山立回灣箭急蟻壤夏漏衝決莫救基根
相扶萬柳千榆輿梢畚土常設備禦建營置卒轉粟實
庾堅彼金隄鑒乎前古秋防夏扞守以朝暮冬計春修
役均編戶岸艤連航兵屯兩渡阻浩浩之波扼憧憧之
路北棹謳晨南帆落暮唯姦是防非利是務右倚太行

橫絕雲霧夫雍阻二嶠之險洛憑九河之固方之於是
彼若平路過濮水之長渠經封國之舊域寥落兮桐牢
之亭湮沒兮黃池之迹何昔也明誓重重諸侯於此以
會同今也京邑翼翼四方於此以取則涉長垣之塗歷
古衛之境城有婦姑之名人恭孝慈之行嘉孔子之八
蒲先宰予以觀政美大家之東征復農田而發運若乃
南瞻潘里北指蘭岡樹新文於二碑易美號於兩鄉因
東封之行幸感瑞應之非常忽有鳴唳降于穹蒼丹頂

未辨於煙際玉羽已穿於仗旁九其數象君道之體陽
再而降符帝運之重光何德動於上天而道盛於前王
也如是哉客既聞臣之說而知漢以宮室壯麗威四夷
宋以畿甸風化正萬國彼尚侈而務奢此誨道而詠德
乃曰使孟堅可作平子再生讀予之賦不敢復談于漢
京也

大酺賦

劉筠

臣謹按前志酺之言布也王德布於天下而合聚飲食

焉肇自炎漢初興日不暇給罰其合醪之會著于三尺之法逮乎孝文崇修禮義賜酺之惠繇是流行況我朝盛德形容汪洋圖課固不可以寸毫尺素孟浪而稱也臣所賦者但述海內豐盛兆庶歡康為負暄獻芹之比爾其辭曰

聖宋紹休兮三葉重光祥符薦祉兮萬壽無疆昭景貺於紀元之號還淳風於建德之鄉慶無邈而不被俗無細而不康乃下明詔申舊章賜大酺之五日洽歡心於庶邦爾乃京邑翼翼四方是則通衢十二兮砥平廣路

三條兮繩直固不以列肆千里集民萬億群有司而先
置戒掌次而具飭幕九章兮燦若舒霞廊千步兮軒如
布翼外饗之百品有叙酒正之六物不忒分命司市遷
闐闐於東西鳩集梓人校輪輿於南北將以極瑰奇
詭異之觀示深慈至惠之澤也於是二月初吉春日
載陽皇帝乃乘步輦出披香排飛闥歷未央御南端
之峽闕臨迴望之廣場百戲備萬樂張仙車九九而
並驚樓船兩兩而相當昭其瑞也則銀笮丹旣象其

武也則青翰舳舻聲砰礚兮非雷而震勢憑凌兮弗葦
而航且觀夫魚龍曼衍鹿馬騰驤長蛇白象麒麟鳳凰
吞刀璀璨吐火熒煌或叱石而成羊文豹左拏兮右攫
玄珠倏耀兮忽藏畫地而川流沔沔移山而列岫蔣蔣
神木垂實靈草擢芒髣髴巨獸綽約妖倡曳綃紈而綵
縵振環珮兮鏗鏘赤刀受黃公之祝大面體蘭陵之王
木女發機於曲逆烏言流俗於冶長千變萬化紛紜頡
頏前者拗怒而欲息後者技癢而激昂舞以七盤之妍

袖間以九部之清商彈箏擗籥吹竽鼓簧南音變楚隴
遂明羌琵琶出於胡部摻鼓發於襍狂方響遺銅磬之
韻羯鼓闐山花之芳笙篴之妙引初畢茄管之新聲更
揚洞簫參差兮上處燕筑慷慨兮在旁琴瑟合奏而奚
辨塤箎相須而靡遑信滿阮而滿谷豈止乎盈耳洋洋
而已哉又若橦末之技趨捷之徒籍其名於樂府世其
業於都盧竿險百尺力雄十夫望仙盤於雲際視高絙
於坦塗俊軼鷹隼巧過猿狙銜多能於懸絕校微命於

錙銖左迴右轉既亟只且嘈噴沸瀆鼓譟厥歛突倒投
而將墜旋歛態而自如亦有倜儻赤子提携叫呼脫去
襁褓負集危軀效山夔之躑躅恃一足而有餘歟對舞
於索上跳丸劍而爭趨偃仰拜起如禮之拘雜以拔距
投石衝狹戲車蛇矛交擊猿騎分驅韓嫣之金丸疊中
孟光之石臼凌虛習五案者於斯盡矣透三峽者何以
加諸復有俳優旃孟滑稽淳于詼諧方朔調笑酒胡縱
橫謔浪突梯嘖嘖混妍醜於戚施變舒慘於蘧蔭乃至

角抵蹴鞠分朋列族其勝也氣若雄虹其敗也形如槁木誰謂乎狼子野心而熊羆可擾誰謂乎以彊凌弱而貓鼠同育斯固藝之下者亦可以娛情而悅目是時也都人士女農商工賈鱗萃乎九達之達星拱乎兩觀之下舉袂兮連帷揮汗兮霈雨鈿車金勒雜遝而晶瑩眩服靚裝藻縟而容與網利者罷登龍斷力田者競辭畎畝屠羊說或慕功名斲輪扁亦忘規矩寂寂兮巷無居人憧憧兮觀者如堵以遨以遊爰笑爰語始乃抃舞於

康莊終乃舍歌於罇俎旁有相如滌器濁氏賣脯乘時
射利鬻良雜苦勺藥之味蚍蜉盡取既費用以兼贏咸
滿志而自許又乃百工居肆衆貨叢聚錦繡之設猷朗
薨廡競相高以奢麗羌難得而覩縷于以見國家蕃富
上下充足女有餘絲男有餘粟顧金土兮同賃興禮讓
兮郁郁若夫七相茂族四姓良家蟬聯鼎盛照耀繁華
皆結駟而連騎雖兩漢其寧加則又有菟裘老臣逍遙
高尚乘下澤之車曳靈壽之杖爰稽首於堯雲挹衢樽

而無量鄉里俊造草澤英才覽德輝而狎至觀國光而
聿來顧鼎食之可取豈直野草之謂哉羽林戴鶡之夫
期門攸飛之子罷羽獵於長楊投賓壺於棘矢襲楚楚
之衣裳喜交臂於廛里大矣哉惟堯舜之作主兮盛德
日新矧臯夔之為佐兮嘉猷矢陳奏君臣相悅之樂會
比屋可封之民湛露未晞在藻之懽允洽太牢如享登
臺之衆咸臻老吾老以幼吾之幼不獨子其子而親其
親鰥寡孤惻兮各有所養蠻夷戎狄兮孰非我臣粟帛

之賜已厚牛酒之給仍均春醴雅醇炮炙薌芬皤髮者
駕肩而洩洩支離者攘臂而欣欣莫不舍和而吐氣蹈
德而詠仁一之二之日樂且有儀三之四之日不醉無
歸五日兮饜飫斯極但見乎含哺而嬉介爾眉壽和爾
天倪非夫上聖之乾乾致治其孰能逸豫而融怡者哉
敢為系曰於鑠我宋巍乎帝先創業垂統靜直動專威
烈既茂文德是宣謙而不宰讓之于天上帝允答靈貺
昭然厥慶惟大庶民賴焉爰錫脯飲流惠周旋有殺如

阜有酒如川既醉既飽無黨無偏體安舒兮被堯日氣
和樂兮暢薰絃祝聖祚兮揚純懿永延長兮彌億年

中園賦

晏殊

在昔公儀身居鼎軸念家食之憑厚斥芳蔬之薦藪粵
有仲子堅辭廩祿率齊體於中野灌百畦而是足惟二
哲之高矩藹千齡之信牘雖顯晦之非偶諒謨猷而可
復豈不以崇高宅乎富貴聲教移乎風俗四民謹舊德
之業百乘鄙盜臣之畜義利潰於交戰矛盾噬兮並鬻

代工而治兮戒在貪競付物以能兮使其茂育斯有位
之良訓乃群倫之所屬天地閉兮賢隱置網張兮獸伏
怖炎火之焚石惡東龜之毀櫝甘田畝以昏作晦膏蘭
而擇福我負子戴兮終年靡勞夏葛冬裘兮匪躬是辱
斯遯世之攸處詎紛華之可瀆眷予生兮曷為幸親逢
乎盛時進寬大治之責退有上農之貲求中道於先民
樂鴻鈞於聖期寓垣屋於窮僻蔽林巒於蔽虧朝青閣
以鳳退飭雨驂兮獨歸窈藹郊園扶疎町畦解巾組以

遨遊飭壺觴而宴嬉幼子蓬鬢孺人布衣嘯傲蘅畹留
連渚湄或捕雀以承蜩或摘芳而翫蕤食周粟以勿踐
詠堯年而不知琴風颯以解愠田雨滂兮及私爾乃壇
杏蒙金蹊桃銜碧李雜紅縹柰分丹白梨誇大谷之種
梅騁含章之飾烏勃旁挺來禽外植櫻胡品糝而形別
棠棣名同而實析大梔朱柿兮駢發棖棖棗安榴兮間拆
榎楂以馨烈蒙采枳棋以甘芳見識援蓂莢於林際架
葡萄於沼側况夫霜薤含潤雲葵薦澤芹自南楚蒜來

西域蘇荏抽頰蓼萋凝液堇薺更茂菲葑代殖苜蓿麗
蕤叢荷羃歷鍾山之菰韭早晚吳郡之莧茄紫白織女
耀而瓜薦大昴中而芋食匏瓠在格以增行藜藿綠陰
而可摘若其愈疾栽菊忘憂樹萱香珍綠蕙媚服崇蘭
玉蘂金荳相思杜鵑辛夷襲紫芍藥含丹游龍出隰芳
苴生原籬槿彫暮宮槐合昏四衢綺錯五出星聯蓂蓂
蘇回切落蕊繁纂纂初妍護臺香而蝶亂聚崖蜜以蜂喧
與夫豬苓馬勃澤荳溪蓀荔芸禦凍椒桂含溫萸房入

佩菰首登殮薜荔成帷昔邪在垣獨堪除渴酸漿治煩
菖蒲感於百陰葶蔕萌於大寒卷施心拔而不死虎鼉
蔓生而自懸羝首牛脣之夥鷄腸烏喙之繁紅鬢緗膚
丹房碧延或山經之號著或藥錄之名傳至夫松檜被
徑梧楸蔭軒江蕉凝牛餒切綠海栢渾圓石安薈蔚扶老
縈纏蠹嶮筠之東羨垂溪柳之三眠或後彫而秀出或
總翠以相先叢灌駢滋翺飛所據驗九扈以農正察五
鳩而民聚戴鶯興蟄織之候布穀起耕耘之務種耜成

而鷓鴣云止楚麥秀而倉庚始翦伯勞驚於早寒盡曰
戒乎將曙晨風不繫而逐雀斲木無聲而食蠹鷦介立
以檀澤烏群噉而反哺鷦匪陋於荆棘鷓無營於鍾鼓
順時律以弄吭樂天和而命侶鶯溢溢以交賀鵲脩脩
而吉語既量爵之不設在槽巢而可俯談王道於樵子
接歡歌於壤父鑿坎井之凝冽決清渠而灌注愚抱甕
以殫力智設棹而盡慮咸不病於夏畦各無憂於梓茹
懿夫觀品彙之零茂識元精之所存覩百嘉之穰儉明

四序之無愆動植飛潛兮得宜乃悅兩暘寒燠兮叶度
而蕃且復諭名花於君子興瑤草於王孫采家丞之秋
實歌上瑞之豐年資旨蓄而御冬擷衆芳而鍊顏至若
嚴客幸臨良辰是邁載掃危榭爰張宴豆蒙山騎火之
茗豫北釀花之酎或秋爽以當局或唐弓而在殼哨壺
枉矢之設博塞樗蒲之侑誠一笑兮相樂亦千金而為
壽灑毫牘以摛思極朋情而卜晝送歸鴻兮海壖楔鳴
瑟兮賓右舞長袖兮相屬命歡謠兮遞奏無取次公之

狂不遺椒舉之舊春晚晚兮氣佳臨高臺兮淑華夏恢
台兮日永蔭茂林兮修迥涼月皎兮鍾漏寂翔霰飛兮玉
宇夏廓丹府以懲忿悅靈龜而繕性茲所謂祛魯相之介
節略於陵之獨行却園夫之利兮取彼閑適荷王國之
寵兮遂夫游泳禽託藪以思驚獸安林而獲騁倡佯乎
大小之隱放曠乎遭隨之命庶樂育於嘉運契哲人之
養正

明堂賦

范仲淹

臣聞明堂者天子布政之宮也在國之陽于巳之方廣大乎天地之象高明乎日月之章崇百王之大觀揭三宮之中央昭壯麗于神州宣英茂於皇猷頒金玉之宏度集人神之丕休故可祀先王以配上帝坐天子而朝諸侯者也粵自蒼牙開極黃靈耀德巢穴以革棟宇以植徹太古之弊明大壯之則風雨攸止宮室斯美將崇高乎富貴之位統和乎天人之理乃聖大造明堂肇起明以清其居堂以高而視壁廓焉而四達殿巋焉而中

峙禮以潔而儉必表之以茅教以清而流故環之以水
暨二帝之述焉合五府而祭矣逮夫夏禮秩秩奉以世
室商祀穆穆制以重屋神禹卑宮階以一尺之崇成湯
受命革以三尺之盛赫赫周堂制度景彰七筵兮南北
之廣九筵兮西東之長堂并包於五室室辨正於五方
面明堂而背北室左青陽而右總章耽然太室嚴乎中
黃都徽名之在南取盛德之向陽或謂厥堂惟一厥室
惟九闢闔其三十六戶疏達兮七十二牖亦規上而天

覆復矩下而坤厚近郊之宮廣而能受通天之宇高而

弗偶八方象其幅員九陛參其前後肅肅

一作桓桓

焉聽政

之廟應辰而周彰趙趙焉承天之柱列宿而相望環林

兮葱蔥圓海兮泱泱既方舟而經梁復素飾其廼牆

陳位序以有嚴議法象而必臧示邦域之景鑠期人神

之樂康左有辟雍天子學宮墳籍浩以明備文物森其

會同奉三壽以勗天下之孝設三之以勸諸侯之風右

有靈臺庶民子來若經始於神明廼占候於昭回天之

道也惟默默以有象聖之心也蓋惕惕而無災此三雍之大者故百世以欽哉若夫約周之禮稟夏之正天子升青陽之位體大德之生彼相協謀有司奉行慶賜必均歷象必明布農事於隼直習舞德於和平止伯益之伐木禁蚩尤之稱兵惟倉廩兮賑天之窮帷幣帛兮禮邦之英無隱不彰無潛不亨蒙蕩蕩之至仁浸灝灝之醇精此明堂之春也萬物為之榮又若炎以繼天義以永日始於仲呂之管復于清宮之律天子乃登諸明堂

暨夫太室命盛樂以象德致大雩以祈實升高明而有
豫定心氣而無逸靜百官之事驅五穀之疾無索於闕
無難於門止北伐之威以助養於生生導南風之和以
飾喜於元元此明堂之夏也萬物為之繁爾乃象正火
位德王金行羽漸于以南嚮穀萬斯而西成天子乃居
總章之奧奏清商之聲圖有功而專任詰不義而徂征
脩法制以謹收藏之令養衰老以惻搖落之情同我度
量平子權衡人社以崇厚兆民報本之志神倉以祕示

萬邦致孝之誠此明堂之秋也天下為之清及夫蟲介
時分虎威夕永詩人發其涼之詠日官賓可愛之景天
子乃北堂以居南面而省錫飲烝之慶從祀寒之請於
是戒門閭備邊境勞三農於休息警百辟於恭靖關市
必易官室必整無用之器斯徹無事之官必省飭國典
以俟來歲之宜講武經以肅萬邦之屏此明堂之冬也
天子為之靜斯乃順其時與物咸宜適其變使民不倦
者也稽夫宗祀之文大享之辰上儀乎皇皇盛節兮彬

彬比於郊也我則取文之勝方其廟也我則取質之純
損益其禮尊嚴其親五天之座曄曄以陳五帝之席奕
奕而倫惟太室之位迺上帝之神作配者先王從祀者
五臣樽斚離離玉幣莘莘牲牢之舉既遵於夏后蔬果
之薦復本於周人禮無不當誠無不臻聖人於是出齋
宮而肅肅被法服而循循酌一獻以從質躬百拜以表
寅司儀實相樂正攸賓進俎豆之吉蠲羅篚簋之輪囷
六樂咸在統美乎列皇八風相盪同和乎大鈞下舞上

歌蹈德詠仁非常之祭駿及者萬國莫大之孝蟻懷者
兆民於是神醉其德人樂而極太史書於策大夫頌於
國頌曰明堂崇之明王祀之禮以成之樂以歌之光天
之下教以化之若夫元朔會同群后對越穆穆乎舜門
之闕晰晰乎宣燎之發帝時待旦而久求衣以先紆黃
組冠通天建日月服乾坤佩干將升崑崙進山嶽之圭
當雲龍之軒正聖人之大寶示天下之有尊巍巍焉負
扆而立濟濟焉辨色而入太常正其等衰九賓序其名

級中階之前三公屹然應門之外九采察焉阼階之東諸侯以同西階之西諸伯以齊門東北面者子之位門西東上者男之次東門之外則有樂浪蟠木九夷之國西面而北上西門之外則有蒙汜大秦六戎之屬南上而東向南門之外則有朱垠越裳八蠻之族唯北是望北門之外則有葦粥幽陵五狄之種唯東是尚於是旣旣旅進鏘鏘肆覲嚮明者蓋取諸離觀光者受之以晉君臣之位定禮樂之道振雅韶以奏文鐸以徇皆望雲

而就日必歌堯而頌舜上和而下樂金聲而玉潤况乎
晨光赫曦天顏弗違冕紱兮霞集玉帛兮川歸盛乎王
庭之聲明煥乎天象之光輝若北辰之會衆星咸粲粲
而在共如太陽之臨多露普湛湛而將晞莫不君三揖
于上臣載拜于下行典禮揚風雅訪雋良議窮寡人曷
幽而覆盆賢曷惻而遺野于以盛名器于以休宗社署
聖法於圓闕馳神教於方夏皇哉耀今昔之榮觀至哉
敷億兆之純嘏故曰揖讓而治天下者明堂之謂也惜

乎三代以還智者間間諸儒靡協議者喋喋而皆膠其
增損忘禮樂之大本泥於廣狹廢皇王之大業使朝廷
茫然有逾遠之嘆惘然有中輟之議殊不知五帝非沿
樂而興三王豈襲禮而治為明堂之道不必尚其奧行
明堂之義不必盡其制適道者與權忘象者得意大樂
同天地之和豈匏竹而已矣大禮同天地之節豈豆籩
之云爾自漢魏之下暨隋唐之際堂或三五之上道非
三五之世蓋不取其厚而取其薄不得其大而得其細


享配之文或然未分政教之烈斯焉弗聞是則帝道不
施胡取乎總期皇德不隆胡取乎合宮故夫明堂之設
也天子居之日敬日思思之何也萬微存乎消息敬之
何也兆靈繫之安危繇是惟克念以作聖思堯舜之齊
名懼巍巍之弗逮迺孜孜於鷄鳴唯至平之休代思阜
財於吾民懼四維之有艱尚瘡痍而百辛故聖人之寶
儉弗下剝而上侈思寡費而薄索民庶幾于格恥惟下
武之太寧亦省躬于干戈取諸豫於四方慨風雲以長

歌惟知人其古難思濟濟乎賢者蓋舉一於臯陶迺連
茹于天下惟好生之至德思與物而為春懼幽陋之靡
及常咨命于仁人惟及人之一德始若晦而彌彰故三
五之君子騰茂實而無疆惟皇極之大範思天下而與
平懼萬物之或差持我心於誠衡然後見天下齊於無
體和於無聲厖眉而壽吾何仁之有含哺而嬉吾何力
之為但淵淵縣縣無反無偏浸淳澤以成若樂鴻化於
自然此明堂之道也蓋無德而稱焉我國家凝粹百靈

薦馨三極東升煙於岱首西展琮於汾側未正天神之
府以讓皇人之德祖考來格俟配天之儀諸侯入朝思
助祭之職豈上聖之謙而愚臣之惑也臣請考列辟之
明術塞處士之橫議約其制復其位儉不為其陋奢不
為其肆斟酌乎三王擬議乎簡易展宗祀之禮正朝會
之義廣明堂之妙道極真人之能事以至聖子神孫億
千萬期登於斯念於斯受天之禧與天下宜而已乎



宋文鑑卷二



總校官庶吉士

臣

張能照

校對官中書

臣

胡紹基

謄錄監生

臣

蔣錦城